

Tutu é kuvi ūvi e táxnū San Pablu iña ñá ñuú Tesalonica

Taxnū Pablu ní ta'an ña tutú iña ña kuínti'xe i, ña ntoo ñuú Tesalonica

1 Xu'u é Pablú u, ni Silvanu, ni Timóteú ne, taxnū ntí tutú sá'á iña ña kuínti'xe i, ña ntoo ñuú Tesalonica, ña ntánuu iní i Xuva ko ní Tó'o ko Jesūcristu. ²Xuva ko ní Tó'o ko Jesūcristú ne, na kūnuu mé'ñu kūnuu dava ña nto. Na tā'xi ña é vā'á koo kuntoo nto ni ñā.

Dá xntēkú kū've Xuva ko iña ña é iō kuetsí i tē nainú Cristu

³Utén utén kantio é nākuéle ntí sintiá'vi nta'a Xuva ko kuēnta iña ntó, ta'an. Dōo vā'á o é kuān koo víi ntí, tsí ñi ntó ne, díí díí ka ntákuinti'xe nto. Dōo ntákuinima ntó ta'an nto dí. ⁴Mii ntí ne, dōo vā'á o ntáka'án ntí kuenta iña ntó ní ña kuínti'xe i Xuva kō, ña ntoo tuku ñuu, tsi dóo ka'nu kuíní ntí tsi ntácutíí nto ntákuinti'xe nto, kuān te dóo ntánto'o nto, kuān te ntáde xení ña'a san ni nto. ⁵Dá kutūni ñá'a tsí ntácutíí nto ne, kutuni ñá tsi dóo ka'nu Xuva kō. Tsí Xuva kō né, dōo vā'á o kadē kú'vē ña. Ká'an ña tsi dóo nuu á'vi nto é kuntōo nto mí kadē kú'vē ña. Dukuān ne, kuenta iña i sá'a e ntánto'o nto.

⁶Vá'á koo víi Xuva ko te ūun kuédadii tsi nantō'o ña ña ntánantō'o nto, ⁷tē tá'xi ña é dadíi kuntoo da'na o ni ntó ntuvi dá ntíi dito Tó'o ko Jēsuu e dukún kan, ní ánje ñā e dóo iō ntíi ña. Uun kaxi'í nuu ka'nu ña te vē'xí ña e dukún kān. ⁸Kué'le ñā é nto'o da xōo ka ña'a, ña é ña ini Xúva kō, ña'a, ña é ña ntáde kuenta tú'ūn val'á iña Tó'o ko Jēsuu. ⁹Ñā tsikán ne, kunaá ña ntíi dañu ntūvi. Ñá xēe ñá nta'a Xuva kō, tsí xio k'i'in ña. Ntē ña kiní ña Xuva kō nté kaa ña, e dóo kaxi'í nuu ka'nu ña, e dóo iō ntíi ñā ¹⁰ntuvi dá nainu xtúku ña. Ntuvi tsikan dá nainu ñá ne, ká'an ūn ntíí ntíí ña'a, ña kuínti'xe i, tsi dóo ka'nu ña. Da kudú'va ña kuínti'xe i san tsi dóo ka'nu ntí'xe ña. Kuan ñi ntó dí, tsi kuínti'xe nto tú'ūn e ntáka'án ntí ni nto kuēnta iña ña. ¹¹Kuenta iña i sá'a ne, ntaíkan ntí nta'a Xuva ko te tā'xi ña é kunūu á'vi nto kuenta iña ña e kána ña nto. Ntaíkan ntí te xntíi ña ntó vata koo é kúvi víi nto é un ntí'i nuú i é vā'a é ká'an ntó tsí víi nto, é un ntí'í é ncho víi nto kuenta iña Xuva ko tsi ntákuinti'xe nto ña. Tsi dóo iō ñá é víi ña. ¹²Kidáā ne, ká'an ñā'a

tsi dóo ka'nu Tó'o ko Jesūcristu kuenta iña ntó ne, ká'an ñā tsi dóo va'á nto kuenta iña Xuva ko, tsi dóo vá'ā o dé Xuva ko ni nto, ni Tó'o ko Jesūcristu.

Ña'a é iō kuetsí i

2 Vi'a ve ne, ká'ān ntí ni nto, tā'an, kuenta iña i dá naīnu xtúku Tó'o ko Jesūcristu é nātaká nuu o ni ñā. ²Sá'a kāká'án ntí ni ntō vata koo é ña te ura tsí i nadama nto e ntántikin ntó, ntē ña kutsú'un nto tē téku nto tē xee ntúvi é nainu xtúku Tó'o kō. Kuān te kaká'an ñá'a tsí xe'é Xuva ko kūtuni ñā, kuān te káka'an ntódo ña'a, kuān te kiní nto tutu é kāká'an ñá'a tsí ntí'i táxnūu ntí ne, ñā ku kuinti'xe nto. ³Ñá dā vá'a nto é kaní nta'ví ña'a nto nté uun nuu i. Ñá xēe ntúvi tsikan da nté dí'na xee ntúvi e dóo ntáde do'o ña'a san ni Xuva kō. Kidáā ne, ki'xi dító uun ña'a, ña é kīni kaa kue'en, ña é kūnaá kue'en. ⁴Ñā tsikán ne, kodo ntí'i ña é kīnchu'vi ña é un ntí'i é kāká'an ñá'a é xuva ñā, é un ntí'i é kāká'an ñá'a é santu. Kidáā né, mii ña nākutúvi ña ini ukún Xuva kō é ncho víi ña Xuva kō. Ká'an ñā tsí mii ñā é Xuva ko ñā.

⁵¿Ñā ntánaka'an ntū nto é kāká'án u ni nto nūu i sá'a dá intóo dadíi ú ni ntō? ⁶Ini ntó ve nee iña é kē'nté nuu itsí ña vata koo é ña ki'xi kantí'i ña dā nté xēe ntúvi i. ⁷Vevíi ne, kakuvi nuu i e dóo xíi kaa san é tuvi xu'ú ne, kuān koo kuví da nté kūntee xío ña ke'nté nuu san. ⁸Kidáā ne, ntii díto é kīni kaa san, ntá tsi ka'ni Tó'o ko Jēsuu i. Kūdii tátsin xu'u tsi ña ka'ní ña i. Uun ito tsí nantí'i ña i tē naīnu xtúku ña.

⁹Diví é víi e dóo xíi kaa san ne, víi vatā ó ntio tó'o é ña vá'ā san é víi. Un vá'a tsi koo ntii é kué'le kuenta, é víi nuu i e dóo ka'nu. Ntá tsi ña te nuu é ntaā i, ¹⁰tsí da kani nta'ví ña'a. Kani nta'ví nti'xe ña'a, ña é kunaa, tsí ña ni ntio ña kuiníma ña é nuu é ntaā i é nakākú Xuva ko ñā. ¹¹Dukuān ne, kué'le Xuva kō é kūtuntu kué'en ña vata koo é kuinti'xe ña tú'un vetē. ¹²Kidáā ne, kué'le ñā é ntō'o un ntíi ntíi ña'a, ña é ña ni kuinti'xe i é nuu é ntaā í, ña e dóo diní i é víi é kīni kaa.

Xoo é nakaxnúu Xuva kō é nakāku ña

¹³Ntá tsi ntí'i ne, nguentúvi ntánakué'le ntí sintiá'vi nta'a Xuva ko kuēnta iña nto, ta'an e dóo kuinima Tó'o ko ntō. Da mii é kuān koo víi ntí, tsí nte dí'na nakaxnúu Xuva ko ntō é nakakū ñā nto, é nakate Espíritū Sántū nima ntó, tsi kuinti'xe nto tú'ūn é nuu é ntaā í iña Xuva ko. ¹⁴Sá'a tsí e kána ña nto da kuinti'xe nto tú'ūn va'á san é ntáka'an ntódo ntí, vata koo é nī'i nto e dóo va'á iña Tó'o ko Jesūcristu.

¹⁵Dukuān né, ta'an, ñā ku nātivi iní nto; ñā ku nakuitā ntó nte xkoó ini nto é nañé'le ntí nto, kuān te xu'ú ntí ntáka'án ntí ni nto, o te tūtú taxnūu ntí iña nto. ¹⁶Mii Tó'o ko Jesūcristu ni Úva ñā, ña e dóo kuinima í kō, ña é nāxnuu ka'nu nima kó ntii dañu ntúvi, ña e tá'xi doméni é kuntetu ó é nī'i ko é vā'a nta'a ña, ¹⁷na nātsu'un ka'nu ña nima nto. Na nātsu'un ka'xi ña nima ntó vata koo é vā'á koo víi nto é un ntí'i nuū i, vata koo é vā'á koo ka'an ntó dī.

Ka'an ntá'vi ntó iiná nti

3 Uun sá nuu i é ká'án nti ni ntó: Tē ka'an ntá'vi nto iiná nti, vata koo é xēe kantí'i tú'un Xuva kō dá kaniī nūxivi ne, tē dóo ka'nu kuiní ña'a san kuénta iña í vata ō kúvi mí ntoo nto. ²Ka'an ntá'vi ntó iiná nti tē ña kadá xení ña kini ntáa sán nti, tsí ña te un ntí'i ñā'a e ntákuinti'xe ña. ³Ntá tsi kade ntaa Xúva kō é kāka'an ña. Naxnuu ka'xi ña nima ntó; nada'an ña nto nuū i é kīni kaa. ⁴Iō ntáa iní ko tsi ntáde ntaa nto e ntáka'án nti ni ntó né, kuan tsí koo víi nto dī, tsí xntii Xuva ko ntó. ⁵Xuva ko na xnū ña nima nto é kuinima ntó ta'an nto vatā ó kakuinima Xúva ko ntó. Na nāxnuu ka'nu ña nima ntó vata koo é na kūtíi nto vata tsí o kutíi Cristú dī.

Kantio é kada tsiñu ō

⁶Vi'a ve ne, kál'án ntí ni nto, tā'an, kuenta iña Tó'o ko Jesūcristu, te kii nteé xio nto ta'an nto da xōó ka ña'a, ña du'xen ī é kāda tsiñu, ña é ña ntío i é kada ntaa vatā ó de nto. ⁷Tsí ini míi ntó nté koo víi nto, vatā o nañé'e ntí nto. Tsi ntí'í ne, ña te dú'xēn nti é kāda tsiñu nti dá intóo ntí ni ntó. ⁸Ntē ña ni e'xí doméni ntí iña nto nté uun nto. Un vá'a tsi ntó'o nti dé tsiñu ntí ntē ntúvi ntē níñu vata koo é ña natekú du'xén

nti nto. ⁹Ñá tē é kuān o dé nti tsi ña vá'a o te xntii ntó ntí, ntá tsi dukuan ō nañé'e ntí nto nté koo víi nto vata koo é víi ntó vatā ó de nti. ¹⁰Tsi da intóo ntí ni ntó ne, ntáka'án nti ni ntó te xoo é ña ntío i é kāda tsiñu ne, ñá kā'xi ña. ¹¹Tsi kútuni nti tsí iō ntó ne, dóo du'xen ntó é víi ntó tsiñu mii ntó; da mii e ntákini nuu nto tsiñu ta'an nto. ¹²Kál'án ntí ni ña kuān o ntáde, naa Tó'o ko Jesūcristú, te diin diin tsi na kuntōo ña, kada tsiñu ña vata koo é naní'i ña é kō'o é kā'xi ña.

¹³Ntá tsi divi nto, tā'an, ñá ku de du'xen ntó é víi nto é vā'a. ¹⁴Tē xoó ña'a ña ntío i é kuinti'xe i e ntáka'án nti ni ntó tutú sa'á ne, koto nto nēe ñá'a ña. Kii nteé xio nto ña vata koo é kūka'an nuu ña. ¹⁵Ntá tsi ña ku de kīni nto ni ña. Kué'e nto ña itsi, vatā o ntáde nto ni tā'an nto.

I'a ntí'í tú'ūn sa'á ve

¹⁶Xuva ko, ña é kāta'xi é kūntoo vá'a ō ne, na tā'xi ña é kūntoo vá'a nto nguentúvi, da nēe ka nuu i. Na kūnuu mé'ñu Xuva ko nto, ūn ntí'í ntí'í nto.

¹⁷Xu'u é Pablú u ne, nta'a mii kó kakā'u u tú'ūn sa'á vata koo é kūtuni nto tsí xu'ú nti'xe dé vá'a u. ¹⁸Na kūnuu mé'ñu kūnuu dava Tó'o ko Jesūcristu nto, un ntí'í ntí'í nto.